

## GEORGE, THOMAS NEVILLE (1904-1980), Athro Daeareg

**Enw:** Thomas Neville George

**Dyddiad geni:** 1904

**Dyddiad marw:** 1980

**Priod:** Sarah Hannah George (née Davies)

**Rhiant:** Elizabeth George (née Evans)

**Rhiant:** Thomas Rupert George

**Rhyw:** Gwryw

**Galwedigaeth:** Athro Daeareg

**Maes gweithgaredd:** Natur ac Amaethyddiaeth; Gwyddoniaeth a Mathemateg

**Awdur:** Mary Auronwy James

Ganed Neville (TN) George ar 13 Mai 1904 yn Nhreforus, Abertawe, mab Thomas Rupert George (yn wreiddiol o Port Eynon, Morgannwg) ac Elizabeth (Lizzie, ganed Evans), y ddau ohonynt yn athrawon ysgol. Mynychodd Ysgol Babanod Pentrepoeth yn Nhreforus, Ysgol Elfennol y Bechgyn yn Nhreforus (1910-14), y Swansea Municipal Secondary School, Ysgol Dynefwr yn ddiweddarach, (1914-19), ac Ysgol Ramadeg Abertawe (lle y codid ffoedd) (1919-20). Enillodd Ysgoloriaeth Hyn i fynd yn un o'r myfyrwyr cyntaf i Goleg y Brifysgol yn Abertawe yn 1920. Cafodd Ysgoloriaeth Ymchwil y Brifysgol ar ôl derbyn gradd BSc (Daeareg, dosbarth 1af, 1924), ac yntau eisoes wedi cyhoeddi dau bapur ymchwil ar y cyd â'r [Athro A. E. Trueman](#). Cynhwysai ei draethawd ar gyfer gradd MSc o Abertawe yn 1925 astudiaeth o galchfaen carbonifferaidd (Avon-aid) lle y daw i'r brig ar ymyl gogleddol maes glo de Cymru a'r haen uchaf Avon-aid ym Mro Gwyr. Parhaodd gyda'r gwaith i'w gwblhau yn yr ardal o Gydweli i Ddyffryn Tawe ac archwilio milod braciopod o'r calchfaen yn Port Eynon.

Yn 1926 dyfarnwyd iddo Ysgoloriaeth Prifysgol Cymru i dreulio dwy flynedd yn Amgueddfa Sedgwick, Caergrawnt, er mwyn parhau gyda'i ymchwil i ffosilau carbonifferaidd. Tra oedd yng Ngholeg St Ioan, Caergrawnt, enillodd Wobr Bonney am waith maes mewn daeareg, a gradd PhD (Cantab.) yn 1928 ar ffosilau troellog Avon-aid.

Dychwelodd i Abertawe yn Ymchwilydd-Arddangosydd mewn Daeareg (1928-30), a arweiniodd at gyhoeddi astudiaeth bwysig ar fath arbennig o fraciopodau, a gwneud map o'r tir calchfaen rhwng Porthcawl a Saint-y-brid gyda chymorth ariannol gan y Gymdeithas Frenhinol. Yn 1930 cyflogwyd ef yn ddaearegydd i Arolwg Daearegol Prydain Fawr. Bu'n mapio daeareg canolbarth Lloegr, er mai'r dasg gyntaf a gafodd oedd rhoi cyngor ynglyn â'r dwr a orlifai dan ddaear mewn pyllau mwyn plwm yn Sir y Fflint.

Enillodd radd DSc Prifysgol Cymru yn 1932 am ei ymchwil ar Spirifidae, calchfaen carbonifferaidd, ac agweddau eraill ar ddaeareg; a'r flwyddyn ddilynol dychwelodd i Abertawe i olynu [A. E. Trueman](#) yn Athro Daeareg a Phennaeth yr Adran Daeareg a Daearyddiaeth (1933-1946). Yn ystod 1933 ymwelodd a daeth yn aelod gohebol o Gymdeithas Ddaearegol Gwlad Belg; cyhoeddodd chwe phapur mewn cylchgronau gwyddonol a pharhaodd gyda'i ymchwil ym Mro Gwyr.

Unwaith eto olynodd [A. E. Trueman](#) gan ddod yn Athro Daeareg ym Mhrifysgol Glasgow (1947-74), lle y penderfynid y maes llafur a chynnwys y darlithiau ganddo ef. Yr oedd yn ddarlithydd ardderchog. Cymerodd ran fel tiwtor yn Ysgol Haf Coleg Harlech yn Abertawe yn 1926; traddododd ddarlith gerbron Cymdeithas Bryste ar 'Hyfforddiant Prifysgol i Ddaearegwyr' (1948); bu'n Ddarlithydd Woodward ym Mhrifysgol Yâl (1956). Treuliodd flwyddyn sabothol (1964-65) yn Gymrawd Tramor Hyn ym Mhrifysgol Northwestern, Illinois. Yr oedd yn Athro Gwadd prifysgolion Witwatersrand, Cape Town a Natal (1967); a Darlithydd Ymweliadaol o Fri Prifysgol Saskatchewan (1974). Gelwid arno i arholi mewn llawer o sefydliadau prifysgol.

Gwasanaethodd yn gadeirydd ar amryw bwyllgorau, gan gynnwys Pwyllgor Glasgow o'r Gymdeithas Brydeinig, panel ar Adnoddau Mwynau Cyngor yr Alban, y Cyngor Cadwraeth Ddaearegol; ac yn llywydd Adran Ddaearegol y Gymdeithas Brydeinig (Lerpwl; 1953), Cymdeithas Athrawon Prifysgol (1959-60), Y Gymdeithas Baleontoleg (1962-64), Cymdeithas Ddaeareg Llundain (1968-70), a chymdeithasau eraill.

Ymhlith yr anrhydeddau niferus a dderbyniodd gellir rhestru: cael ei ethol yn Gymrawd o'r Gymdeithas Frenhinol (1963), Hon. D-ès-Sc (Rennes; 1956), LLD er Anrhydedd (Cymru; 1970), ScD (Cantab., 1970); a derbyn Medal Lyell (Cymdeithas Ddaearegol Llundain, 1963), Medal Clough (Cymdeithas Ddaearegol Caeredin, 1973), Gwobr Kelvin (Cymdeithas Athronyddol Frenhinol Glasgow, 1975), Medal Neill (Cymdeithas Frenhinol Caeredin, 1978), a medal Prifysgol Charles (Prague).

Bu'n Olygydd Cysylltiol i'r Gymdeithas Frenhinol, ac yr oedd yn awdur: *Evolution in Outline* (1951), *British Regional Geology Series* - (gyda B. Smith) *North Wales* (1961) a (gyda J. Pringle) *South Wales* (1937 a diwygiadau), *Aspects of the Variscan Fold Belt* (yn rhannol; 1962), *The British Caledonides* (yn rhannol; 1963); *The Geology of Scotland* (yn rhannol; 1964), *University*

*Instruction in Geology* (1965), (cyfraniad i) *The Upper Palaeozoic Rocks of Wales* (1974); a chyfraniadau ar ddaear a phaleontoleg i gylchgronau technegol.

Priododd yn ystod haf 1932 â Sarah Hannah Davies, MA, PhD, darlithydd prifysgol; ni fu iddynt blant. Bu ef farw yn 1 Princess Terrace, Glasgow, ar 8 Mehefin 1980.

## Awdur

Dr Mary Auronwy James

## Ffynonellau

*Who was who?* 1971-1980

*Biographical Memoirs of Fellows of the Royal Society* 1991, Cyf. 37, 199-217

*Oxford Dictionary of National Biography*, Cyf. 21, 922-3

*Mynegai Bywgraffyddol W. W. Price*

University College of Swansea, Annual Reports of the Council, 1920-34; 1945-46

University of Wales Dissertations 1899-1949

## Dolenni Ychwanegol

VIAF: [58083121](#)

Wikidata: [Q7792716](#)

Dyddiad cyhoeddi: 2012-06-06

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

